

150 onns Museum retic

Il Museum retic festivescha quest onn ses 150avel giubileum e dat cun l'exposiziun actuala «La Chombra mirvegliusa» in sguard enavos sin la lunga istorgia che cumenza cun Peter Conradin von Planta (1815–1902).

L'onn 1869 applescha quel – ensem cun persunas da medema opiniun – da fundar ina «Fundaziun grischuna per scienza ed art». Lur finimira è quella da stgaffir in museum, en il qual pon vegnir collezziunads e mantegnids bains culturals dal Grischun, per als proteger da la vendita u da la destrucziun. Cun ses appel sa drizza Conradin von Planta a Grischunas e Grischuns en Svizra ed a l'exteriur, ed als dumonda per donaziuns a favur da ses project. Ultra da daners sa rimnan uschia er objects e cudeschs istorics che furman la basa dal nov museum. L'onn 1872 cuntanscha el sia finimira: il Museum retic avra sia emprima exposiziun en la chasa Buol. A chaschun dal giubileum dal Museum retic è il terz plan dal museum uss emplenì cun 150 stgazis dals ultims 150 onns. Per mintg'onn dapi l'avertura è vegnì tschernì in object che ha chattà sia via en la collezziun durant quel onn. Uschia dat l'exposiziun ina survista representativa: chaussas custavilas, veglias e raras èn presentas gist tuttina sco chaussas sorprendentas, banalas u stranas, tut in sper l'auter, tut en il stil da l'anteriura chombra mirvegliusa. (cdm/fmr)



Dapli informaziuns da l'exposiziun en il Museum retic chattais vus cun quest QR-code.



Il sarcofag egizian ch'ils dus industrials Jacques Ambrosius von Planta e Peter von Planta avevan regalà a lur cusarin Peter Conradin von Planta vegn mussà a chaschun dal 150 onns Museum retic. Sin la fotografia sura è da vesair il «Churer Burgerbecher» da l'onn 1876.